

太平經鈔發部卷之十

外十

一曰神道書二曰核事文三曰去浮華記都曰大順之道太者大也大者天也天能覆育萬物其功最大平者地也地乎然能養育萬物經者常也天以日月五星為經地以嶽瀆山川為經天地失常道即萬物悉受災帝王上法皇天下法后地中法經緯星辰歡濟育養萬物故曰大順之道

神人真人聖人賢人自占可行是與非法古者神人自占是非得與不得其事立可觀也。不但闇昧昭然清白神道至眾染習身神正心意得無蔽匿善者出惡者伏即自知吉凶之法如照鏡之式也於此之時賢明自安時不再來物不重應乃得獨盛洽遠方故事見其應見慎無拒逆撰以為寶器可謂得天地之心意矣其事時矣事皆職矣神道來矣賢者謀矣吉人到矣邪者不來矣清明見矣四方悅矣幽人隱士出矣得天心矣得治術矣邪不發矣自然達矣真人來輔矣天下善應矣各以其事來矣去憤亂矣此應出腹中發

于胸心乃若雷電之應證也夫瑞應反從胸中來隨念往來須臾之間周流天下心中所欲感動皇天陰陽為移言語至誠感天正此也念者能致正亦能致邪皆從志意生矣使能動天地和陰陽合萬物入能度身出能成名賢不肖皆由斯生故賢者善御萬不失一人腹中有過反面亦何也心者五藏之主主即王也王主執正有過乃白於天也驚即面青何也肝者主人人者憂也反核肝膽為發怒故上出青也諸神皆有可主以萬物相應故令人常自謹良而順天地而災不得復起也

外學多內學少外事日興內事日衰故人多病故多浮華浮者表也華者末也夫天道遠入邪中不能自還所謂神道書者本根與陰陽合與神明同核事文者考核異同疑誤不失浮華記者離本已遠乃居野其文錯亂不可常用時可記也守本者治若神矣守中者少亂而煩矣守末者昏矣故賢者守本戒中不敢從末也夫能守之不止方方善來者無

拒逆撰為寶器萬世不復易也人力自為善者可死乎邪辟夷狄却乎兵革絕乎杖策絞無聲乎四方安乎道路通乎人君明乎神策大人守之動四方中士為之令臣良小人為之不相傷其辭約其法明占神文乎不可行不能持乎慎無傷以拘奸乎

以自防却不祥法順用四時五行外內思正身散邪却不祥懸象而思守行順四時氣和合陰陽羅網政治鬼神令使不得妄行害人立冬之後到立春盛行用太陰氣微行少陽之氣也常觀其意何者病為人使其神史黑衣服思之閑處四十五日上至九十日令人耳目聰明立春盛德在仁氣治少陽王氣轉在東方與木行其氣弱而仁其神史青衣思之幽閑處四十五日至九十日令人病消以留年行不止令人日行仁愛春分已前盛行少陽之氣微行太陽之氣以助少陽觀其意無疑深思其意百邪服矣立夏日盛德火王氣轉在南方太陽之氣以中和治其神史用之得其意口中生甘神史赤衣守之百鬼去

千里夏至之日盛德太陽之氣中和之氣也其神史思之可愈百病季夏六月盛德合治王氣轉在西南迴入中宮其神史黃衣思之今人口中甘每至季思之十八日立秋日盛德在王金王氣轉在西方斷成萬物其神史白衣思之四十五日至九十九日可除病得其意今骨強老壽秋分日少陰之氣微行太陰之氣也逆疾順之立冬之日盛德在水王氣轉在北方其神史黑衣令人志達耳聰守之四十五日至九十九日百病除此五行四時之氣內可治身外可治邪故天用之清地用之寧天用之生地用之藏人用之興能順時氣忠臣孝子之謂也此名大順天地陰陽四時五行之道故道為仁賢出不為愚者生矣

皆隨人盛衰此天地常理若以神同域而善御之靜身存神即病不加也年壽長矣神明祐之故天地立身以靖守以神興以道故人能清靜抱精神思慮不失即凶邪不得入矣其真神在內使人常喜欣欣然不欲貪財寶辯訟爭競功名久久自能見神神長二尺五寸隨五行五臟服飾君仁者道與君柔者德生中心少有邪意遠方為之亂神氣周流疾於雷電急還神明以自照內故病自愈而人自治故人生百二十上壽八十中壽六十下壽過此皆夭折此蓋神游於外病攻其內也思本正行令人相親愛古之求壽不失其道者天地有常行不可離本也故求安而長存者慎無忘此道本元也故畫圖以示後來陳人物生受命之時久遠以來到今不失陰陽傳類更相生而久長萬萬餘世不可闕也一衰一盛高下平也盛而為君衰即為民盛即得道衰即受刑夫孝者莫大存形乃先人統也揚名後世此之謂善人謹民天地愛之五行功之四時利之百王任之萬民好之鬼神

祐之五藏神留之遇二得生本且失之離我神器復為灰土變化無常復為萬物矣分別形容邪自消清身行法道之生人本皆精氣也皆有神也假相名為愚人不知還全其神氣故失道也能還反其神氣即終天年或增倍者皆高才或求度厄其為之法當作齋室堅其門戶無人妄得入日往自試不精不安復出勿強為之如此復往漸精熟即安安不復欲出口不欲語視食飲不欲聞人聲關鍊積善瞑目還觀形容容象若居鏡中若闕清水之影也已為小成無鞭策而嚴無兵杖而威萬事自治豈不神哉謂入神之路也守三不如守二守二不如守一深思此言得道深奧矣

通神度世厄法天之生人萬事畢備故十月而生與物終始故可度災厄致太平上士學道輔佐帝王當好生積功乃久長中士學道欲度其家下士學道纔脫其軀道為賢明出不為愚者能用之者言不能用之寧無傷無賊哉

賢不肖自知法上士高賢事無大小悉盡畏之中士半畏之下士全無可畏上士所以畏之者反取諸身不取他人心開意通無包容知元氣自然之根尊天重地日月列星五行四時六甲陰陽萬物鼓行動搖之屬皆不空生鬼神精魅六合之間表裏風雲雷電不空行也此皆有神有君長比若人有示故畏之不敢妄行中士半畏之者上不知元氣自然之有術纔知今見風雨雲氣與生物也尚時言天無神不畏列星日月也纔知大火北斗下士則不知土地山川之廣大可核纔知耕田種其所有治其家春術也不知四時五行可以何廢也但知隨而種樹之收其利耳不知六甲陰陽為神通言其無有也夫人愚學而成賢賢學不止成聖聖學不止成道道學不止成仙仙學不止成真真學不止成神皆積學不止所致也

一曰延命夷狄自伏法萬種其類不同俱得老壽天地愛之其身無咎所以然者名為大順之道道成畢身與天地同域古者為之萬

神自得欲知其効瑞應自至凶禍自伏帝王以治不用筋力能知行此夷狄自伏行之不已成真人故聖人之教非須敲搗擊而成因其自然性立教帝王所以能安天下者各因天下之心而安之故得天下之心矣是道修古文人本生時乃名神也乃與天地分權分體分形分神分精分氣分事分業分居故為三處一氣為天一氣為地一氣為人餘氣散備萬物是故尊天重地貴人也故三皇五帝皆立師疑者跪問之故國常治雖災危亦可愈也

王者無憂法大順之路使王者無憂無事致太平夫天地不大動搖風雨不橫行百神安其居天下無災矣萬物各居其處則樂無憂矣何以致之仁使帝王常樂道使無愁苦也若帝王愁苦即天下不安夫帝王天下心也群臣股肱也百姓手足也心愁則股肱安為手足行運不休止百姓流蕩是其自然相使也天亦如是也天失道雲氣亂地失道不能厥矣王者與天相通夫子樂其父臣樂其君

地樂於天天樂於道然可致太平氣天氣且一治太上皇平且一下天地和合帝王且行吾道何咎之有道者天之心天之首心首已行其肢體寧得不來從之哉

還神邪自消法分別三氣所長還神守身太陽天氣故稱神形者太陰主祇包養萬物故精神藏於腹中故地神稱祇精者萬物中之精故進退無常天地陰陽之精共生萬物此三統之歷也神者主生精者主養形者主成此三者乃成一神器三者法君臣民故不可相無也故心神動搖使形不安存之不置利其可安即留矣不用其可安即去矣始學用其可安之教之久久自都安不去矣陰氣陽氣更相摩礪乃能相生人氣亦輪身上下精神乘之出入神精有氣如魚有水氣絕神精散水絕魚亡故養生之道安身養氣不欲數怒喜也古者明師教帝王皆安身使無憂即帝王自專矣天喜太平氣出無不生成天恨形罰之氣出莫不殺傷萬物莫不被其毒故同憂也天不守神三光不明地不守神山



川崩淪人不守神身死亡萬物不守神即損傷故當還之乃曰強不還自守曰消亡也

和合陰陽自天有地自日月自陰有陽自春有秋自夏有冬自晝有夜自左有右自表有裏自白有黑自明有冥自剛有柔自男有

女自前有後自上自下有君有臣自甲有乙自子有丑自五有六自木有草自牝有牡自雄有雌自山有阜此道之根柢也陰陽之樞機神靈之至意也

令人壽治平法三氣共一為神根也一為精

一為神一為氣此三者共一位也本天地人之氣神者受之於天精者受之於地氣者受之於中和相與共為一道故神者乘氣而行精者居其中也三者相助為治故人欲壽者乃當愛氣尊神重精也欲正大事者當以無事正之夫無事乃生無事此天地常法自然之術也若影響上士用之以平國中士用之以延年下士用之以治家此可謂不為而成不理而治大道坦坦去身不速內愛吾身其治自反也

七事解達法以德治身何如及以治萬民致大和之氣何如善而不達何能安哉以仁義

治身何如及治萬民何如善而不達何能安哉以禮治身何如及以治萬民何如善而不達何能安哉以文治身何如及治萬民善而

約束使不得為非何如善而不達何能安哉以治身何如及治萬民何如善而不達何能安哉以滅武兵革治身何如及以治萬民何如善而不達何能安哉然此七事亦不可無

亦不可純行古者神人治身皆有本也治民乃有大術也使萬物生各得其所能使六極

八方遠近惟喜萬物不失其所乃當自然能安八方四遠行恩不失毫毛今未能養其本末安能得治哉今此上德仁義禮文法武七事各異治俱善有不達而各有可長亦不可廢亦不可純行治身安國致太平乃當深得其訣御此者道也合以守一分而無極上帝行之乃深乎不可測名為洞照之式救四知優劣法天生人凡有三等第一天生第二地生第三人種類受命天者為人君受

命地者為人臣受命人者為民君者應天而行臣者應地而行順承其上為民者屬臣轉

相事凡是三氣共一治然後能成功故上之安者其臣良也臣職理者其民順常民臣俱善其君明其治長太平者以道行三氣悉善

合乎章也懷道德不相傷也故大人治道以平天下救四海恩及夷狄禍不得起其善證日生凶不得來中士學道為國臣助其治也

度其家辟禍災其次治道損其父母反遠遊德獨小薄纔脫軀也安能輔明王助國家哉

能平四海者天助之為人臣者助為治與地謀纔自脫者道狹小無可得治此三人皆度世老壽有大小不同邪是神去留教道法神人言明行放道視命在誰乎今人昭然覺悟知命所從來法審誰者持其正也人法陰陽生陽者常正陰者常邪陽者常在陰者常無陽者常息陰者常消陽者常生陰者常殺人日三變象三氣其政殊異相與分爭乖錯不相從也而習使其常守人形容者吉唯有真道者能專精自殊異也

不學者則不知神去留之効立見之物不可隱也故君子制尸不制鬼人不臥之時行坐言語分明白黑正行住立文辭以為法度此人神在也及其瞑目而臥光景內藏所念得之但不言神在內也及其定臥精神去遊身不能動口不能言耳不能聞與眾邪合獨氣在即明證也故精神不可不常守之守之即長壽失之即命窮人之得道者志念耳失道者亦志念耳

救迷轉帝王法大道變化無常乃萬里相望上下無窮周流六方守之即吉不守即傷陰陽開闢以為常其付有道使善人之其壽命與天地為期夫德有優劣事有本末凡事悉道之也將與者得善將衰者得惡比若土地得良土即善得薄土為惡善上合天賤者都澤坐者為主人行者為流客此盡道也善人行成福惡人行成災善人得以為福德專者得之駕乘卑者得以步足聖賢得以度世小人得之不相剋賊此皆道也教不重見時不再來急教帝王今行太平之道道行身得

度世功濟六方合生之類矣

太平經鈔卷之十



太平經卷之三十五 原缺十一卷 至三十四卷 受一

分別貧富法第四十一

真人前子連時來學道實已畢足未邪今天師不復為其說也以為已足復見天師言迺知其有不足也今意極訖不知所當復問唯天師更開示其所不及也行真人來天下何者稱富足何者稱貧也然多所有者為富少所有者為貧然子言是也又實非也何謂也今若多邪偽倭盜賊豈可以為富邪今若凡人多也君王少豈可稱貧邪愚暗生見天師有教不敢不言不及有過子尚自言不及俗人安知貧富之處哉今唯天師令弟子之無知比若嬰兒之無知也須父母教授之乃後有知也善哉子之言也太謙亦不失之也諾真人自精為子具言之富之為言者迺畢備足也天以凡物悉生出為富足故上皇氣出萬二千物具生出名為富足中皇物小減不能備足萬二千物故為小貧下皇物復小於中皇為大貧無瑞應善物不生為極下貧子欲知其大效實比若田家無有奇物珍寶為